



## 23 tapak tanah runtuh Empangan Mengkuang perlu dibaiki segera, sebelum dibuka kepada umum – KM

September 8, 2018



**PENANTI** – Sebanyak 23 tapak tanah runtuh yang dikenal pasti sekitar Empangan Mengkuang perlu segera dibaiki, memandangkan kawasan tersebut turut dibuka untuk rekreasi awam.

Justeru, Ketua Menteri, Y.A.B. Tuan Chow Kon Yeow memohon Kementerian Air, Tanah dan Sumber Asli (KATS) mempercepat kerja-kerja yang akan memastikan keselamatan dan fungsi Projek Pembesaran Empangan Mengkuang (MDEP).

“Kami ingin membuka semula Empangan Mengkuang kepada orang awam, tapi terdapat 23 tapak tanah runtuh di sekitar empangan yang belum dibaiki,” ujarnya pada lawatan dekat Empangan Mengkuang di sini pada 8 September 2018.

Ahli Dewan Undangan Negeri (ADUN) Penanti, Dr. Norlela Ariffin turut sertai Teh Lai Heng (ADUN Penanti merangkap Setiausaha Politik kepada Ketua Menteri) turut sertai lawatan kerja berkenaan.

Sebelum itu, Ketua Pegawai Eksekutif Perbadanan Bekalan Air Pulau Pinang (PBAPP), Dato' Ir. Jaseni Maidinsa memberitahu, Empangan Mengkuang telah diperbesar untuk menyimpan sehingga 73.5 bilion liter air.

Pun begitu, menurutnya, integriti struktur empangan tidak dapat dipastikan sehingga ia dipenuhi pada tahap maksimum iaitu 55 meter (m).

Selain itu, Jaseni menjelaskan bahawa air mentah perlu dipam dari Sungai Kulim untuk mengisi Empangan Mengkuang.

“Bagaimanapun, Rumah Pam Mak Sulong belum lagi berfungsi, dan oleh itu, belum ditauliahkan,” katanya.

Difahamkan, MDEP terdiri oleh tiga fasa kerja.

Fasa 1, pembesaran Empangan Mengkuang menelan belanja RM607 juta demi meningkatkan kapasiti simpanan air mentah maksimum daripada 22 bilion liter kepada 73.5 bilion liter. Projek siap pada 10 April 2017, dengan tempoh liabiliti kecacatan sehingga 16 November 2019.

Fasa 2A, menaikkan Rumah Pam Mak Sulong menelan belanja RM63.5 juta demi meningkatkan kapasiti pam air mentah (daripada 200 juta liter sehari atau MLD kepada 400 MLD) dari Sungai Kulim untuk membantu mengisi Empangan Mengkuang.

Fasa 2B, pemasangan saluran paip 6.85 kilometer (km) bergaris pusat 1.6 meter (m) paip keluli lembut dari Rumah Pam Mak Sulong ke terusan Sungai Dua untuk menaik taraf kapasiti pengagihan daripada 300 MLD kepada 600 MLD.

Tambah Jaseni, selepas mesyuarat pada 2 April lepas, Menteri bersetuju bahawa projek yang dianggarkan menelan belanja RM100 juta dan masih belum selesai itu akan diteruskan dengan jangkaan siap pada tahun 2020.